

Claudia Nooren-Ruiz Vasquez



A LIFE WITH A PURPOSE

Poco hende sa cu e ta reponsabel pa cambio di “diseño interior” di hopi proyecto na Aruba. Claudia Nooren-Ruiz Vasquez (39) a yega Aruba tempo cu e colorman cu tabata sobresali tabata ros of beige. E decor en general, riba nos isla, den e decada 80 y 90 tabata falta calor y su identidad Caribense. E tempo ey nos tabata sa e trabou di un decorador pero poco tabata haci uso di ‘interior design’, e diseño interno di bo negoshi of cas.

Orginalmente di Guatemala, Claudia Vasquez a yega Aruba na año 1996. Su intencion tabata pa keda 1 año y mey na Aruba pero den transcurso di e año, Claudia a enamora nos isla y awe despues di 12 año, a haci di Aruba, su dushi hogar.

Claudia, un Fashion Designer, gradua for di Universidad IFES na Guatemala, ta considera e logro aki un base for di cual e ta opera den diferente area den e mundo di diseño.

“Na Universidad mi a studia ‘Fashion Design pues Diseño di Moda’, for di cual mi tin e base di tambe por funciona riba e tereno di entre otro, ‘interior design’. Semper, e composicion di universal design, color, textura, diferente material di telanan, tipo di vloer, etc.. tabata atrae mi. Tempo cu mi a yega Aruba mi no por a compronde dicon e ‘look’ di Aruba tabata asina tanto Miami-pink. Despues mi a compronde cu no tabatin mucho escohenencia riba e isla.

Aki, ta unda Dios a permiti mi di tin bon contactonan den exterior, pa por tin acceso na cierto tipo di producto y material, cu mi ta usa aki, den mi proyectonan.”

Claudia ta pensa cu e Favor di Dios

den Su tempo apunta, combina cu un bon trabou y excelente servicio ta multiplica su mes, pa hiba na exito.

Basicamente, tur cos a cuminsa ora cu Dios a habri e porta atraves di un amistad cu mi tabatin cu e doñonan di Boonoonoonos Restaurant. Nan a pidimi pa haci e ‘interior design’ di nan restaurant y for di aki e portanan a keda habri. Un boca a bisa otro, unda mi a hayami ta haci e look rustico di Havana y tambe di Djakarta Restaurant. Na comienzo Claudia tabata tin dificultad pa haya hende compronde e significacion di ‘interior designer’ vs un decorador externo. Hopi hende ta conoce esnan cu ta ‘decora’ un lugar, yama como ‘decorador’. “Un ‘interior designer’ ta otro, mi ta desaroya ‘concepto’, mi ta traha cu e imagen di e negoshi y su diseño cu ta locual cu tin cu match loke ta ser bendi of e servicio cu ta ser duna”. Den un proyecto completo, Claudia ta involvi ya caba, for di e inicio, cu ta di e parti di pintamento di mapa, pa asin’aki hunto cu e arquitecto incorpora e angulo mas practico pa asina completa e vision di diseño cu e tin, pa su proyecto final.

Atraves di e añanan, Claudia su expertisio y experiencia a hib’e pa oportunidadnan

pa haci proyectonan manera e.o., remodelacion di e lobby di Marriott; e restaurant di Marriott yama Buena Vista Restaurant; e precioso lobby di Radisson Hotel; e renovacion di e pacus Maggy’s den caya grandi; tambe e diseño Frances cu nos conose anteriormente di restaurant Chez Mathilde; e prestigioso oficinanan di Price Waterhouse Coopers; tambe e diseño completo di e clubhouse di Divi Links, incluyendo e dos restaurantnan, Windows y Mulligans; y e sitio na unda nos a conduci e entrevista aki den e fabuloso cas de cofi, Smit & Dorlas. **“Akiden mes, den e diseño original e bentananan tabata mas chikito. Mi ta scucha e ideanan di mi clientenan y bin cu un concepto. ‘Interior design’ no tin nodo di ta caro, bo mester conoce bo budget, bo deadline y tin hende pa traha.”**

Claudia no ta cumpra un pintura pa djis pega na muraya. E ta laga traha locual e kier mira, riba e producto final. Mescos ta conta pa e tipo di ‘drapery’, e no kier yama nan ‘cortina’ pasobra nan mester tin cierto estilo y diseño cu e kier mira. Pa loke ta e material specifico cu e kier mira, di cierto calidad, e ta sali busca loke ta den su concepto, si e no hay’e, no ta problema. Mayoria biaha e ta “custom make” te ora e



tin e satisfaccion completo den loke e tabatin como intencion inicial, pa mira como su producto final. E ta sinti cu el a yega Aruba pa un bon motibo, si e mira loke el a contribui atravez di añanan y a descubri pa su mes atraves di esaki.

Un di su ultimo proyectonan ta e guia completo di e concepto di e diseño di e 'concession area' di nos Aeropuerto. Den e diseño aki Claudia a usa como su inspiracion nos joyanan di nos laman. Aeropuerto di Aruba como nos porta principal, drenando nos isla, e intencion tawata pa e turista lo haña su prome impresion di un isla cu identidad Caribeño pero tambe moderno, na e mes momento.

E lampinan diseña pa Claudia, ta inspira pa coralnan flotante. Nan a wordo comisiona pa e talentoso artista local Ciro Abath. Tambe e tegelnan a wordo traha, di tal forma pa imita nos color di santo di laman, cocolishinan natural y tambe a incorpora e toke di mother of pearl.

Claudia no ta traha solamente pa

companian grandi, pero tambe a completa varios proyecto pa residencianan local riba nos isla. Y aunke pa aña 2008, kisas tin varios punto riba su agenda, tin otro pasionnan cu ta dirigi e curason di Claudia cu a hib'e na su propio interior. **"Tin ora mi ta sintimi manera un octopus, pasobra mi tabata kier a haci otro proyectonan. Un di nan ta, loke mi a studia esta 'Fashion Design', e detayenan lo bira conoci pronto. Mi mester a tuma tempo liber, pa 'haya' mi mes. Mescos cu mi ta cuminsa un proyecto for di fase di e trahamento di e plan di e mapa, Dios e "Master Interior Designer" tambe tin un plan y proposito pa cada un di nos, den Christo Hesus, for di inicio di mundo. Den mi temporada cu mi a tuma off y ta den silencio, mi a descubri mi 'proposito' y rason di ser. Tambe mi tin cu gradici mi casa cu a permitimi y a encurashami den dicho direccion..."** E 'proposito' cu Claudia ta papia di dje ta creacion di un NGO (Non Governmental Organisation). E organizacion mester yuda

hobennan riba caya, tanto na Aruba como na Guatemala. **"A tard'ami asina tanto haya mi proposito den bida. Mirando back awo, for di hopi jong caba mi por a identifica cu un dia mi tabata kier ta Coco Chanel, (mi pasion pa 'fashion') y un otro dia Mama Theresa (e curason di Jesus pa otro nan). Na e momento apunta, e dos mundonan opuesto aki a haya otro y ta e momento cu mi a descubri mi proposito."** Claudia Nooren-Ruiz Vasquez "emberdad" a haya su mes, si nos mira e 'smile' grandi riba su cara ora e ta papia di su metanan nobo. E sa dicon e la haya su talentonan y kico pa haci cu nan. Mirando e expansion di su talento, Claudia lo sigui contribui na su pais adopta Aruba, riba diferente tereno cu su trabounan, talentonan y pronto tambe cu su trabou social.

"What I have achieved is nothing compared with the great challenges that are placed in my hands in the nearest future." 